

16/05/2003

`Jangan jadikan parti tempat persinggahan'

KOTA KINABALU: Pengerusi Badan Perhubungan Umno Sabah, Datuk Musa Aman, mengingatkan ahli Umno di Sabah tidak menjadikan parti itu sebagai `tempat persinggahan' untuk kepentingan diri.

Beliau yang juga Ketua Menteri Sabah sebaliknya berkata ahli Umno di negeri ini perlu terus menyayangi parti dan meyakinkannya sebagai pembela maruah dan kedaulatan negara serta bangsa.

"Apabila kita suka, kita singgah. Apabila kita tidak suka, kita tinggalkan. Umno tidak menghendaki perangai politik seperti itu.

"Umno memerlukan ahli yang komited terhadap perjuangan bangsa. Ia sebuah institusi politik yang menjadi pelindung dan pembela maruah bangsa serta kedaulatan negara. Umno bukan persinggahan sementara," katanya.

Beliau berkata demikian dalam perutusan pada majalah rasmi Umno Sabah, `Gagasan' keluaran khas sempena lawatan Perdana Menteri, Datuk Seri Dr Mahathir Mohamad, ke Sabah mulai malam tadi.

Dr Mahathir yang dalam rangka lawatan dua hari ke Sabah dijadual menyempurnakan majlis pecah tanah projek bangunan Umno Sabah di Karamuning di sini, petang ini.